



Umcimbi lomkhulu wephigogo

Siswati



Harold Gondwe

Umcimbi lomkhulu wephigogo

Ibhalwe nguHarold Gondwe
Umdvwebi nguKaren Ahlschläger



TICWASHISO KUBAFUNDZISI NEBAFUNDZI

1. Lencwadzi yetindzatjana ilungele ticheme tebafundzi labaneminyaka lengu **8** kuya kulabaneminyaka lengu **10**.
2. Lelibhuku letindzatjana linemaganyana langu **662**.
3. Entela ebafundzi emagama titfombe kute batokwati kuwafundza baphimisele.
4. Linganisa, usebentisa sikhawulosikhatsi lesiku makhalekhukhwini nobe lesisewashini kubona samba semaganyana lawa umntfwana langakwati kuwafundza ngemzuzu, bese usibhala phasi, unake kakhulu kutsi siyandza yini sibalo semaganyana lati kuwafundza ngemzuzu.
5. Cela umfundzi nobe umntfwana kutsi akufundzele indzinyana, aphindze akukuchazisele kutsi lendzatjana ikhulu mangani.
6. Sebentisa ingcikimba yalendzatjana kubuta imibuto lemayelana nalokwenteka kulendzatjana.



Iphigogo beyihlela umcimbi lomkhulu
welusuku lwayo lwekutsalwa.

Beyiloku icabanga kutsi ingawentanjani
lomcimbi wayo uhluke kunaleminye
imicimbi yelusuku lwekutsalwa.

“Yebo! Ngaze ngayitfola intfo letawenta lomcimbi wami kutsi bonkhe bantfu bakhulume ngawo,” yasho iphigogo ivula kancane timphiko tayo itsi kujikajika.

Phela iphigogo beyatiwa ngekutigcabha, itigabisa ngetimphiko tayo letinhle letimibalabala.

“Angeke ngimeme tonkhe tilwane, ngifuna tilwane letinetimphiko kuphela, ngalesikhatsi sesidansa, sitawukhombisa buhle betimphiko netinsibatetfu. Ngatsi sengiyabona sengivule tonkhe letimphiko tami.”



Yacala ke iphigogo kubhalela bonkhe
lefuna kubamema, tinkhukhu, emadada,
timphangela, inshi. Simemo besitsi
kumele bete nebalingani babo, bagcoke
timphahla letimhlophe kuphela, kutawuba
nemncintiswano wekudansa.

Labatawuphumelela batawutfola
sipho lesihle. Wo! Kwasuka umsebenti
lomkhulu sekufunwa timphahla
letimhlophe.



“Mine ngiva ngicasuka kabi nyalo sekumele
ngiyotsenga timphahla letimhlophe
kube ngitatigcoka sikhashana nje,” kusho
inkhukhu itfukutsele kakhulu.

“Ngingakusita ngikupheleketele ngiyokufunisa
ngoba vele awunalo liso etimphahleni,”
kusho lidada lihleka inkhukhu.



“Mine anginayo inkinga ngetimphahla
letimhlophe kusho kona kutsi
ngitawunidlula nonkhe, ngitawube
ngimuhle kakhulu,” lidada lelo likhuluma
ngekutigcabha lokukhulu.



Kutse kusacocwa njalo, vumbu lufudvu,
“Sanibonani nikhuluma ngani ngoba ngatsi
nicakekile nje?” kubuta lufudvu.

“Atikufuni wena letindzaba, awukamenywa
kulomcimbi ngobe awunato timphiko,”
kusho inkhukhu.

“Vele ungatihluphi ufike kulomcimbi awusilo
lilunga lemndeni wetfu,” kunanatela lidada.

Indzaba yalomcimbi bese kukhulunywa
ngayo, loko kwenta kutsi lufudvu lufune
indlela yokuya kulomcimbi noma
lungakamenywa.

Lwevakala lukhuluma lodvwa lufudvu
lutsi: “Ngiyaya mine kulomcimbi
kute lotangivimba, batangibona
sengingekhatsi.”



“Uyativa kutsi utsini, ungafuni kuyotihlazisa wena uma ungakamenywa uyaphi vele?” kushoinja izama kubonisa lufudvu.

“Lalela la wena mnumzane yinja, angikaceli umbono wakho, angati kutsi ukhulumani, ngicela uvale umlomo wakho!”

“Ngatsi ngiyabona sebakucosha ungakadli nekudla,” yasho ihleka kancaneinja ihamba ishiya lufudvu lucabanga lisu lokuya kulomcimbi.

Lufudvu lwacala lwenta emalungiselelo okuya kulomcimbi.

Belungafuni kubonwa kutsi lwentani, belenta konkhe ngekufihla.

“Uyati lufudvu lufuna kuyotihlazisa ngekuya emcimbini lungakamenywa,” kushoinja icoca nelikati.

“Ase niyekele lufudvu luyati kutsi lwentani mine nje angifuni kuyingena lendzaba,” kusho likati.

“Ngiyakutjela wena, sitativa tindzaba ngalomcimbi,” yashoinja ishiya likati.

Lwafika lusuku lolukhulu, hhayi beyidliwe ingcephu. Tangena tilwane tihamba nebalingani bato.

Lwachamuka lufudvu selunyonyoba
lutipende bonkhe buso lutivale
ngemaski, simanga ngobe belubonakala
lunetimp'hiko ngatsi telidada lushayela
etulu ngiyakutjela wena!



Wacala umcimbi, iphigogo yevakala ikhwehlela kancane, yashaya ingilazi ngesipunu yentela kutsi itokhuluma kahle.

“Ngicela kutsi wehlise lizinga lemculo,” yasho imphangela yehlisa umsindvo phela bekungiyi lesetinkhinobheni.

“Ngiyabonga bahlobo bami kutsi nite kutojabula kanye nami kulolusuku lwami lwekutsalwa, kudla kunyenti angeke nikucedze nangabe kukhona lokusele nitakutfwala uma senihamba.”

Yasho ngecutigcabha lokukhulu iphigogo. “Kwekugcina sitawuba nemncintiswano wekudansa, lotawuphumelela nginesipho lesihle kakhulu.”

Tikhulumi, takhuluma tibongisa iphigogo
ngelusuku iwekutsalwa loluhle kangaka.

Baletsa kudla netinatfo kwaba mnanzi
kakhulu. Ekugcineni kwahlatjelelwa liculo
lekukhulisa iphigogo.



Kwase kufika sikhatsi sekudansa phela. Imphangela yacobela tingoma lebetingavumi kutsi unghahlala phansi.

Naku sekufika lena letsi: "Jerusalema."
Kwasukuma yonkhe indlu bonkhe bafuna kukhombisa likhono labo.

Lwevakala lufudvu selutsi: "Ngeke phela ngiloku ngitibambelela, ngiyafa phela ngalengoma."

Lwasho lungena enkhundleni lwashona phansi lwabuya lwavumbuka, selujuluke lumanti nte, naloko letipende ngako lapha ebusweni sekucala kuncibilika.

Kutse kusenjalo nalo lidada selivakala litsi:
“Ngicela kudansa nawe.”

Lwavumela etulu lufudvu lujabule lufile.
“Kunini ngililindzele lolusuku,” kusho lufudvu,
basho bagacana.



Lufudvu nelidada bese baphakatsi
enkhundleni babashayela tandla,
kubonakala kutsi batawuphumelela
kulomncintiswano.

Lidada belifuna kubukisa laphakamisa
lufudvu ngeluphiko.



Kwamangalawonkhe lobekakhona lapho luphiko lwela phasi. Lwabatse lufudvu luzama kutsatsa loluphiko, lwehluleka ngobe bese luvele ebaleni.

Kwevakala umsindvo “Hawu kantsi lufudvu lolu, lutente lidada lwaya emcimbini lungakamenywa,” basho bafuna kulushaya.

Seluphetfwe ngulamanye emahloni, lufudvu lwafisa ngatsi kungavuleka umgodzi lungene kuwo.

“Phuma uhambe nyalo! singakakushayi sonkhe,” kusho inshi, ifuna kulubamba ngalolu lolunye luphiko iluphose ngaphandle lufudvu.

"Hheyi! nine kusekhaya lami lapha, kute lotawushaya lufudvu lapha, niyangiva kutsi ngitsini!" kwasho iphigogo ibuka lufudvu ngeluvulo.

Lufudvu belungenamagama beluloku lutishayisela umoya ngalemaski yalo. "Ngicoleleni nkhosi yami, ngiyacolisa kakhulu," kusho lufudvu lutikhalela.





Inja nelikati bebahlola ngelifasitelo,
bafile luhleko, bevakala bamemeta
batsi: "Ulayekile wena fudvu uboyekela
kuya emcimbini uma ungakamenywa."

EMAVI EKUBONGA

Ibhalwe ngu

Harold Gondwe

Umdvwebi ngu

Karen Ahlschläger

Umhleli

Mavis Ndlovu

Umhleli wetitfombe

PixelPing Design



ISBN 978-1-920702-39-7



basic education

Department:
Basic Education
REPUBLIC OF SOUTH AFRICA



•• NATIONAL
•• EDUCATION
•• COLLABORATION
• TRUST